

Despues di sinta mas di 8 luna den prison, fiscal ta pidi y huez ta otorga libertad na acusado di violacion sexual

ORANJESTAD(AAN): Diabierna R.J.B di 24 aña presenta dilanti di mesa berde di huez na corte di husticia, debi na e hecho cu el a wordo acusa di violacion sexual di un mucha muher di 12 aña.

Tabata continuacion di un caso cu a aparece na diferente ocasion na corte.

Cada vez e caso a wordo posponi door di cierto peticionnan hasi.

Ultimo biaha tabata abogado Chris Lejuez representando e acusado, kende a pidi huez pa pospone e caso, pa hasi un investigacion mas profundo riba e supuesto yamadanan cu a tuma lugar entre e sospechoso y e victima.

Segun rapport di e caso, despues di ricibi algun yamada straño y cu su yiu a cuminza comporta su mes tiki diferente, e mama a insisti y su yiu muher a conte cu el a wordo viola.

E mucha a conta cu ora cu el a bay cumpra number pa su wela, el a topa cu R.B kende e tabata conoce un tiki y R.B a puntre pa drenta su auto.

Ora cu e mucha a drenta, R.B a lock a portanan y a core bay cu e mucha den mondi y eynan el a viole.

E mucha muher a bisa tambe cu R.B tabata yame y menaze pa e no conta ningun hende.

R.B di otro banda a declara cu nunca el a viola e mucha muher.

El a bisa cu e no tabata conoce e mucha muher, pero cu e tabata ricibi varios yamada di e mucha muher.

Den file di e caso tabata tin un lista di yamada cu a wordo hasi, den cual por a mira entre otro 29 yamada cu a wordo hasi for di telefon di cas di wela di e mucha muher, den direccion di celular di R.B.

Fiscal a menciona sinembargo cu el a wak cu varios yamada a wordo hasi di celular di R.B pa telefon di wela di e mucha muher den weekend, cu ta e dianan cu e mucha muher tabata keda cerca su wela.

R.B a bisa den corte cu si ta berdad cu el a viola e mucha muher, ta straño cu e mucha muher ta yame

frecuentemente despues cu supuestamente el a wordo viola.

Rapport di docter a indica cu e mucha muher no ta virgen mas.

Na dado momento a bin un discusion riba e 'print out' di yamada di telefon, pasobra Fiscal a bisa cu R.B tabata yama e mucha muher frecuentemente, pero no tabata tin un lista di yamada pa muestra exactamente con tur cos ta hinca den otro.

Pesey Lejuez a pidi pa bin cu e print out completo di cierto yamadanan hasi, pa por determina ken a yama ken, ken a yama prome, con largo e combersacionnan a dura etc.

Mirando tambe e hecho cu a wordo bisa cu otro personanan lo a tene relacion sexual cu e mucha muher, e abogado a pidi pa e personanan aki wordo scucha como testigo.

E mama a entrega un demanda di 10.000 florin, pa loke ta entre otro e gastonan di psiquiatra y e daño causa na e mucha muher.

Diabierna e caso a continua y fiscal a splica cu den e investigacion di e yamadanan no por muestra cu R.B a yama e mucha muher.

Fiscal a muestra e acusado riba un combersacion di pin riba su telefon cu e tabata tin cu un mucha muher cu ta bisa cu e tin 14 aña, unda cu R.B lo ta propone pa nan Sali cu otro etc.

Sinembargo R.B a bisa fiscal cu e no sa di e combersacion ey, pasobra no tabata e.

Fiscal a sigui hasi diferente pregunta na e acusado pa e

haya sa mas informacion, pero na dado momento ora cu e yega ora di bin cu e exigencia di castigo, el a splica cu pa exige un castigo di violacion, mester tin mas prueba cu solamente 1 declaracion.

El a bisa cu apesar cu e ta sinti cu algo no ta cuadra full den e caso aki, e no tin prueba pa condena R.B.

Pesey el a pidi huez pa declara R.B liber di tur acusacion, despues cu R.B a sinta caba 8 luna y 20 dia den detencion preventivo.

Fiscal a pidi huez tambe pa e no honra e demanda entrega di 10.000 florin.

Abogado Lejuez dimes tabata di acuerdo cu locual fiscal a trece dilanti y el a trece algun punto extra tambe acerca.

Entre otro Lejuez a indica cu e mucha muher a declara cu apesar cu R.B tabata uza un man pa domine, RB a bisti un condom si.

Lejuez a puntra su mes con ta posibel pa uza un man pa tene un persona abao y bisti un condom cu e otro man.

Tambe e abogado a bisa cu segun e mama, e mucha a keda tur traumatiza, pero segun e recordnan oficial di yamada, e mucha muher a yama R.B varios biaha, despues di e dia riba cual supuestamente R.B a viole.

Na final huez no tabata tin ningun otro opcion cu declara R.B liber di tur acusacion y ordena su libertad di inmediato.

E mester a bay KIA si pa busca cu pertenencianan, despues di cual e lo wordo laga den libertad.

(19 di Oktober 2013)